

四庫全書

集部

欽定四庫全書

集部

滄溟集卷九

十九

詳校官庶吉士_臣柳邁祖

中書_臣劉源溥覆勘

覆校官中書_臣朱鈐

校對官庶吉士_臣嚴福

謄錄監生_臣劉耀馥

欽定四庫全書

滄溟集卷九

明 李攀龍 撰

七言律詩

殷太史正甫至自太山為贈

明堂天子昔登壇
御道風流擁漢官
海色迴臨三觀動
春陰不散五松寒
白雲忽向封中出
玉牒誰從篋裡看
此日滿朝求禪草
相如早晚入長安

又作此問正甫

上宮春色自何年
阿閣神房幾洞天
囊裡定攜三秀草
懷中曾擬四愁篇
射牛漢蹟今猶在
繫馬吳門似杳然
七十二家論祀典
還朝可奏聖人前

送吳峻伯之楚

才子風流滿禁林
傳經海岱主恩深
諸生自紀銜魚事
千里誰知相馬心
王氣日隨江漢轉
方城春壓洞庭陰
憐君宦跡偏形勝
四十參藩豈滯淫

送朱大中丞召拜少司空還朝

二首

執憲登臺海岱東銜恩入拜少司空長安近指迴車日
間闔遙分曳履風北斗秋高玄武署五雲春滿建章宮
懸知魚藻歡無極漢主從容問畫熊

其二

八月仙槎海上行司空謁帝鳳凰城漢庭經術還高第
畫省風流自列卿視草星辰堪動色按章朝野盡知名
況逢麟閣多賢日非復當年折檻情

送崔中甫入對

才子乘春集帝京燕山宮闕五雲生按圖自動千金色
射策還高片玉名清問從容天下事朝廷經畧海方兵
一時得意諸年少莫學終軍浪請纓

寄贈漢陽楊明府

方城仙令日為群各把銅章百里分江漢至今稱楚望
風流何必減諸君東臨黃鶴飛雙鳥西接蘭臺見五雲
早晚主恩誇羽獵滿朝誰不薦雄文

贈李明府暫詣廣川奉送景王之國

帝寵親王出牧年逢迎東道借才賢郎官舊列星辰上
朱郎新開日月邊千乘旌旂分羽衛九河春色護樓船
知君不廢鳴琴興應教還操桂樹篇

和李明府春日馳戀度闌之作

百里弦歌太岱東美人為政復誰同河陽縣裡花常滿
北海樽中酒不空製錦還看成麗句裁斑忽憶舞春風
何妨問寢憑雙鳥擬送王喬入漢宮

酬朝城張明府和御史中丞蘇丈秋興見寄

聞君為縣武城傍花裡絃歌不下堂佳政日來多薦疏
美名年少滿詞場揮毫色動郎官宿托簡光搖御史霜
千載並傳秋興賦可知潘令在河陽

送劉侍御歸臺

四首

使者乘秋入建章曉排閭闔侍君王繡衣忽動雲霄色
白簡猶含海岱光自許風霜知列栢還將諷諫托長楊
大東杼柚看如此况復徵兵事朔方

其二

才子高名八使中
登車千里競稱雄
西臺入奏聞天語
東海陳詩見國風
伏柱久推三楚駿
還朝爭識五花驄
極知未盡澄清意
獻納猶堪寵漢宮

其三

蘭臺使者出長安
風俗三齊攬轡看
今日殿中玄武仗
須君柱後惠文冠
彈章氣借山河壯
執法秋臨節鉞寒
儻值東封陪扈從
舊游偏奉六龍歡

其四

繡斧東來按部年一時風裁萬人傳烏臺高傍黃圖起
青案遙依紫極懸三殿直聲推許國九河秋色送朝天
正逢宣室齋居日羨爾持書捧御筵

送謝中丞還蜀

二首

微垣法象切三台御史中丞憲府開參執廟堂刀筆吏
燕提郡國羽林材煙塵部索臨東夏節鉞朝恩壓外臺
直擬賊平答明詔誰知投杼自天來

其二

元戎幕府檄書成
枹鼓春風遂不鳴
東觀齊名推李杜
西臺獨坐見澄清
君王更寢中山篋
談笑堪銷渤海兵
暫去恐非高卧日
佇看安石起蒼生

送馮汝言學憲之浙江

二首

使者清秋擁漢槎
五雲回首望京華
傳經南國推高第
執憲中朝屬世家
紫氣欲臨滄海日
綵毫先動赤城霞
還披絳帳延諸少
為報西施剌浣紗

其二

儒臣奉詔外臺居況復揚波海晏如門下美才收竹箭
卧中高士羨桐廬山川半入吳都賦風俗兼傳越絕書
始信工文官自達主恩垂老不曾疎

羅山甫自晉祖齊見困鹽官暫詣京師攜家南
還遂有此贈

十載青雲跡漸疎風塵作客意何如服車垂老偏知驥
彈鋏從工不為魚游子千金堪買賦佳人五色漫裁書
江南薊北俱搖落那得樽前憶故廬

重送山甫

短髮蕭蕭日影孤
清秋行色又皇都
百錢杖底猶懸否
片刺懷中好在無
老去它鄉惟藥物
愁來佳句滿江湖
只言倒屣尋常事
不是燕山舊酒徒

送何戶曹之金陵

江上層臺繞鳳凰
石城秋色正蒼蒼
黃金不厭東南氣
紫闕猶懸日月光
帝謂何郎終傅粉
人傳荀令本含香
即今起草從容處
轉餉風流海一方

春夜許使君集送江生過謁李伯華太常江善
鼓琴因句及之

君家綵筆美名齊客裡瑤琴重解攜抱膝自高梁甫調
絕絃空老雍門啼冰開華館三魚集月出春城五馬嘶
近報太常深作事相逢應共醉如泥

送方山人

紅顏裘馬客京華十載春風上苑花忽爾壯懷生海嶽
脩然清興滿烟霞已拚白髮投詞社肯惜黃金盡酒家

最是子雲甘寂寞也因奇字識侯芭

送許右史之京

二首

春林譚譚鳥嚶嚶花裡開樽送友生華髮我堪雙別淚
綈袍君自一交情白雲欲贈湖中色紫氣遙臨海上城
明日已拚車馬絕不妨書札報柴荆

其二

少年車馬日紛紛老去誰應更識君酒態美如嵇叔夜
詩才清似沈休文曳裾忽動梁園雪飛蓋兼停鄴下雲

試向樽前看過鴈春風那不念離群

夏日襲生過鮑山樓

長白山人本種田談經半住嵒湖邊攜來滿甕春城酒
乞得諸生月俸錢倚檻四高滄海氣銜杯一望縉雲天
尋常雞黍休嫌薄不淺交情二十年

神通寺

相傳精舍朗公開千載金牛去不迴初地花間藏洞壑
諸天樹杪出樓臺月高清楚西峯落霜淨疎鐘下界來

豈謂投簪能避俗將因卧病白雲隈

過吳子玉函山草堂

玉函山色草堂偏恰有幽人擁膝眠
樹杪徑迴千澗合
窻中天盡四峯連
綠陰欲滿桑蠶月
白首重論竹馬年
就此一樽無不可
因君已辦阮家錢

酬張轉運龍洞山之作

春山遙上翠微連
忽出藤蘿一徑懸
削壁雲霞開五色
中峰日月隱諸天
浮漚並結金龕麗
飛竇雙銜石甕圓

莫怪驪珠君已得寒秋元自有龍眠

與轉運諸公登華不注絕頂

中天紫氣抱香鑪復道金輿落帝都二水遙分清渚下
一峰深注白雲孤岱宗風雨通來往海色樓臺入有無
不是登高能賦客誰堪灑酒向平蕪

魏使君過宿鮑山山樓分賦

層樓風雨一登臨把酒重論十載心楚客豈須疑白壁
鮑山堪自見黃金塞帷上國風霜滿伏枕中原日月深

忽憶明光曾共被那知萍梗到于今

使君重過山樓分賦得空字

使君千騎入從東此日登臨作賦雄
樹杪平湖元在地簷前疊嶂半浮空
煙霞色借雙轡動牛斗光搖一劍通
自入鹿門常謝客誰能濁酒過龐公

和魏使君扶侍遊太山

中天詖蕩敞天門上帝樓臺拱帝孫
五馬並臨吳觀重諸峰獨讓大人尊
秦松忽借蒼顏駐海日遙銜紫氣屯

可道黃河看似帶須知西北是崑崙

李伯承謫亳州

十載風流寵漢庭一時才子見漂零
便從天上來真氣縱落人間亦客星
肯惜陽春迴綠綺自愁明月按青萍
江湖我輩堪猶若差可扁舟問獨醒

得元美兄弟書

愛弟何因興太豪逾今四海羨吾曹
金莖並擢青雲秀玉樹雙銜白雪高
江上錦翰排藻疏吳門練影散緋袍

知君難作池塘夢
春色看人引濁醪

答元美

闔閭城上有高臺
海色蕭條對酒杯
千里驂騑堪自老
孤飛鴻鵠一何哀
秋風忽傍扁舟起
明月遙含尺素來
白雪驚人操不得
因君此曲暫徘徊

答王敬美進士

江左風流迴自今
中間小陸更能文
五花欲就龍為友
千里高飛鵠不群
亂去東南無王氣
愁來西北有浮雲

只今年少稱才子屈指詞林已到君

謝魏使君題白雪樓

白雪新題照畫闌
鮑山堪此對盤桓
楚宮一送江天色
郢曲長飛海氣寒
繞夜朱絃清自語
凌雲綵筆老相看
使君不是元同調
千載陽春和者難

寄右史

聞君天上聽吹噓
薊北春風滿素書
東壁儻難分未照
何門不可曳長裾
即看投散官逾穩
莫笑憐才術大疎

諸子當時堪自見于今意氣有誰如

寄汝南徐使君

美人為政有輝光太守能名讓汝陽此日單車俄罷郡
青春五馬暫還鄉君才堪自風波老上意元從雨露長
篋裏謗書休苦問恐令年少識行藏

吳使君自建寧移邵武

十載徘徊侍從群銅符更向七閩分且疑落魄終遷客
也自風流一使君五馬忽驚龍渚氣雙轡猶畫幔亭雲

已知才子官難起無那吳郎雅好文

南樓

南樓暇日坐崢嶸白髮從他望裏生
海近雲霞常繞戶山迴風雨動連城
綵毫一散中原色濁酒偏含我輩情
千載陽春須此調少年休說是虛名

白雪樓

伏枕空林積雨開旋因起色一登臺
大清河抱孤城轉長白山邀返照迴
無那嵇生成懶慢可知陶令賦歸來

何人定解浮雲意片影漂搖落酒杯

杪秋同石史南山眺望

二首

青樽何處不蹉跎白髮相看一醉歌坐久鏡中懸片華
望來城上出雙河杉松半壁浮雲滿砧杵千家落照多
縱使平臺秋更好故人猶恐未同過

其二

回首飛鴻碣石標清霜處處錦林凋層巖倒映平湖淨
積翠斜連粉堞遙四海交游空老大一時賓客更蕭條

病來苦愛觀濤賦不分梁園此見招

為周明府太霞洞天卷題

太霞高館洞天遙東接蘭津十二橋巖壑盡銜滄海氣
樓臺常對赤城標雲烟五色春相麗金碧諸山夜自朝
仙令怪來工製錦真陽人喜得王喬

贈周真陽明府

仙令風流百里才談經新自蜀天回彩毫忽動梁園色
丹竈還鄰葉縣開琴裏春生桐栢水月明人在景夷臺

只今汝穎高賢聚為有郎官一宿來

送魏使君入朝

青春五馬入朝天稍似明光草奏年方岳只今雄海岱
山河原自壯幽燕風雲忽傍檐帷起日月猶臨省署懸
况復政成聞問好黃金不是上恩偏

送魏使君入覲兼呈吳邵武

如雲計吏集神京此日江湖見友生自是古今雙五馬
居然南北兩專城漢廷交映黃金詔楚客同蜚白雪聲

治行不知誰第一獨應巖穴愧高名

為問明卿即承聖天子垂問巖穴隱

逸豈復有狂如李生者於邵武邵武因自多賢矣

寄贈襄史周象賢

春色高齋萬里生曳裾常日罷逢迎
雲霄未報中丞疏江漢先傳外史名
俠客銅鞮多駿馬佳人花豔動傾城
王門自昔棲遲地何限龐公避世情

明溪篇二首贈周都閫

明溪斜帶越臺高遠送清光照錦袍
勢奪潮聲雄鼓角

波分海色壯旌旄浮雲深控嫖姚騎秋水常函別駕刀
翻恨普天無戰鬪臨觴不得更投醪

其二

越臺山下小江干一曲遙開漢將壇槎動星河天上下
陣成魚鳥鏡中看戈鋌忽溢澄潭色組練偏縈素渚寒
此日非熊應入夢心隨渭水到長安

錫山尊賢祠

長史祠堂海一隅諸君精爽夜常俱懸知震澤珠來往

莫問東峰錫有無前輩風流開俎豆南朝伏臘見枌榆
何人不羨秦公子血食賢哉二大夫

秦丈為武昌公建開利寺觀鵝亭

江上新亭接梵臺風流重憶右軍才相攜愛馬高僧過
自許籠鵝道士來池水如披霜練出煙霞猶傍彩毫開
使君暇日多延眺可但南樓興已哉

除夕魏使君攜長君及黃山人見過同賦

三徑蕭條雨雪前使君除夕報周旋檐帷自御元方出

賓客兼攜叔度賢太史定疑滄海氣陽春先動楚宮篇
諸生光寵霑行酒不獨荀家事可傳

與魏使君宿龍洞山寺同賦

四首

迴壑深林繞梵宮春來吟眺使君同空潭忽散三峰雨
暗穴常吹半夜風人擬二龍精自合詩看五馬步逾工
諸天坐失懸鐙色明月先投入掌中

其二

使君春興滿綈袍綵筆青山對濁醪望去天回雙闕迴

坐來雲盡一峰高蛟龍出入常風雨鴻鵠拚飛自羽毛
愧我淹留逢楚客攀援桂樹咏離騷

其三

削成東壁五雲屏下有龍宮夜不扃斗柄故臨雙甕轉
月明常對一珠亭春回竹葉杯光白天逼蓮花劍氣青
坐久空山仙籟寂新詩獨為故人聽

其四

秀色中峰獨不群藤蘿二月已紛紛諸天近海金銀氣

雙峽長春錦繡文塔影半空懸落照溪流一曲灑浮雲
縱令洞口龍吟發郢調還須讓使君

寄殿卿

春滿梁園興不孤平臺一望盡平蕪于時授簡酬知己
何處銜杯憶老夫浪跡已應為客就浮名猶自傍人無
只今慷慨夷門道肯讓蕭條在五湖

答殿卿

莫問看春第幾場纔兼風雨更茫茫能無對酒思公子

亦有登樓望故鄉敢謂馬卿元在漢何如枚叔正游梁
病來已廢凌雲筆為愛觀濤擬報章

送翟使君奏最

三臺年少雅相聞五馬邊州老使君更擁星軺趨北斗
還依露冕拜南薰政成黃鵠誰云匹佩有青萍自不群
海內重名推佐郡那知詞賦並凌雲

送張轉運之南康

首二

此去專城又楚都遙臨五嶺壓三吳坐來齋閣江聲合

忽傍檐帷嶽色孤
白晝落星寒劍氣
清秋石鏡滿冰壺
美人欲報瓊瑤賦
彭蠡春深鴈有無

其二

轉運舊為太僕丞南刑部

轉運風流動海方
僕臣司駕早稱良
齊鹽萬斛乘艘下
冀馬千羣入塞長
廬岳使君新領郡
金陵仙吏舊含香
須知共理勞明主
不但西京數趙張

柬張問甫使君

裘馬當時滿漢關
故人誰不羨紅顏
只今湖海窮相傍

可道風塵老自閑
伏枕此身惟濁酒
拂衣何處不青山
與君俱作漂零客
容易今年斷往還

賈明府侍太公

郎官承寵建章迴
海岱春深百里開
經術家傳新息長
風流人羨洛陽才
心同鄴令雙鳬舞
身御于公駟馬來
怪得五雲高列宿
即看南極近三台

贈蓬萊王少府

漢宮清切右曹開
染翰當年屬妙才
天上鳳毛猶五色

斗間龍氣劃雙迴，雲霞春滿千家邑。
山海秋高萬里臺，自是仙郎偏雨露。
總為遷客亦蓬萊。

送耿蠡縣之官

百里初分上谷城，傍臨易水接燕京。
地偏俠客風猶在，天近郎官宿轉明。
北闕青雲懸鳥影，西山白雪入琴聲。
看君三異尋常事，何限當年卓魯情。

酬右史題扇見贈

紉扇新題寄遠篇，纔開篋笥已堪憐。
清風忽自蘭臺至，

明月還從鄴下懸佳客滿堂疎翰墨美人千里共嬋娟
何因懷袖含香署再使君恩出入偏

苦熱因憶右史覽揆之辰作此為寄

河朔風流避暑年平臺此日更翩翩客惟枚叔元稱叟
主自梁王雅好賢兔苑近含蒿少雪鴈池遙動廣陵天
故人苦熱心同渴安得金漿共爾傳

答殷卿書

故人書札到寒溫病起蓬蒿正滿門彭澤妻孥相對老

淮南賓客自言尊，頌成濁酒深知德。
投罷明珠始見恩，莫為尋常招隱士。
山中轉復念王孫。

酬黃山人郡中見懷之作兼呈魏使君

千山佳色郡齋前，楚客相思秀句傳。
白雪調成堪自老，青雲名在好誰憐。
胡牀夜傍南樓月，濁酒春開北海天。
羨爾風流陪坐嘯，轉令人見使君賢。

慰魏使君悼子

郡閣春深種合歡，將雛一曲動雙彈。
褰帷此日驚騎竹，

灑淚何人說夢蘭
楚壁自含明月墮
隋珠空抱夜光寒
況逢羸博分符地
片石焦堯不忍看

陶明府自羅山移東安

仙令風流自汝陽
三臺薦䟽滿明光
不緣馴雉聞當寧
那得飛鳬入帝鄉
地近五雲窺製錦
天迴列宿映垂裳
折腰未是君家事
珍重彈琴單父堂

送汪仲安之長沙藩理官

三楚風流總帝鄉
蘭臺池館漢諸王
官貧舞袖旋應拙

老去長裾曳不妨授簡春陰生岳麓開樽秋色動瀟湘
從來此地多才子弔屈還看有和章

九日

九日陶家菊自黃更聞飛鴈搗衣裳誰人對酒能無賦
何處登高不望鄉二水寒光搖落照孤城秋色動清霜
那知極目中原苦數子江湖未盡狂

和余德甫江上雜詠

城下春江繞戶斜誰開三徑俯龍沙客攜彭澤先生酒

人指南州孺子家一劍寒光搖北斗西山秋色送雲霞
只今海內無同調高枕從君老物華

題仙人騎白鹿圖贈魏使君

少室仙人玉不如飄搖來自太林墟已參白鹿雲中駕
復把青羊洞裏書二女三花相綺麗霜毛短髮共蕭疎
使君何讓臨淮守夾轂雙隨五馬車

荅子與病起見寄

青門遙向汝陽分伏枕傳書到白雲已道風波能失所

更逢搖落不堪聞
九歌自我思公子
七發何人起使君
一日齊名千載事
驚心豈獨久離羣

寄題子與使君薜荔園

二首

太守為園自一邱
遙看薜荔接滄洲
醉來忽下湘君淚
賦罷深知楚客愁
黯淡欲飛天目雨
蕭條猶帶洞庭秋
惟應日共蓬蒿長
安得聊從仲蔚遊

其二

老蔓成帷網四隣
紛紛落葉雪溪濱
嬋媛初服能無客

窈窕空山若有人楊柳摧殘彭澤隱桃花俗殺武陵春
獨憐遠道難為理欲采何由寄所親

青蘿館

二首

十畝青蘿別館開使君延眺意悠哉風搖北渚清陰合
煙雜南山黛色來臺敞高秋深染翰庭虛斜日淨銜杯
西隣榮叟常還往帶索應同薜荔裁

其二

湖上高齋此一時垂蘿四面繞茅茨欲令何處紅塵入

可道窺人片月疑色借古松成遠勢意含幽石有餘姿
空傳蔣詡開三徑不過裘羊那得知

寄子與

何言雨雪薊門深明日褰帷是上林湖海弟兄餘灑淚
雲霄詞賦足知音猶堪一起中原色莫使長懸萬里心
不為故人勞問訊十年書札總浮沈

冬日登樓

佳節高樓酒復清鮑山斜日入杯平天涯誰借窮交淚

海內空傳拙宦名
四野浮雲垂雪色
千林朔氣擁寒聲
醉來極目中原盡
獨抱風流萬古情

子與病起移書二美
吳下羣賢爰脩禊事
踊躍勝遊遙為屬寄

伏枕經春憶舊遊
永和三日命扁舟
一時藝苑人亡恙
千載蘭亭事可求
吳下山川何蘊藉
王家兄弟本風流
獨憐搦管傳觴處
有客中原自白頭

魏使君以太公登太山

何言紫氣滿崑崙須信中原五嶽尊南極一星朝日觀
東方千騎擁天門舞衣重染雲霞色探篋深銜雨露恩
試向丈人峰上望徂徠新甫拱兒孫

病甦憶王徐二子

伏枕高樓白日徂夢回春色杳相扶風流轉覺中原盡
海嶽驚看我輩孤寒雪千山雙鬢老浮雲萬里尺書無
也知俱壯觀濤興只是漂零不可呼

答贈廬陵劉山人

西來獻策薊門深，栖泊王家玉樹林。
說劍夜高湖海氣，鳴琴秋入薜蘿心。
別時春色長相似，歸去浮雲不可尋。
萍梗愧君能記憶，十年遙寄白駒音。

答寄余德甫

當年草奏栢梁臺，此日漂零濁酒杯。
伏枕春陰三楚合，拂衣秋色大江迴。
含冤夜識雙龍氣，作賦時推二馬才。
極目中原諸子盡，豫章城裏一書來。

薛氏瑞室自衡州使君以來不罹火事者二度

君子美之但為題止宜記頌然不可無律體
乃先難以屬和者一首

赤董山火照城東郭外巍然太守宮舊俗龍蛇元自厭
比隣燕雀竟相蒙獨飛蜀郡尚書雨再反江陵大尹風
四壁遺經亡恙在諸孫往往見文雄

寄憶余德甫

綵筆花生尺素寒西山飛雪正漫漫何來章貢雙江合
並倚雌雄兩劍看無那中原長伏枕可知千載一彈冠

即今寥落陽春曲滿眼巴人和客難

滄溟集卷九

欽定四庫全書

滄溟集卷十

明 李攀龍 撰

七言律詩

答寄聶儀部子安

司馬雄才動帝京，當時群從獨高名。
秦成華省青雲氣，賦就仙郎白雪聲。
春色迴分南北望，江流不盡古今情。
應憐此意同巖穴，千里傳書歷下生。

薛子熙以青州使君聘脩郡誌見枉林園尋示

贈章作此荅寄

越客風流問字年，登臺把酒白雲天。
一毛實自河東下，雙鯉兼從海上傳。
彩筆乍含星野動，明珠長對雪宮懸。
已看霸氣前朝盡，猶說當時鮑叔賢。

病間荅許殿卿

病客高齋黯澹生，何來一札大梁城。
夢回滄海風雲色，春落黃河雨雪聲。
伏枕自須疑慢世，曳裾兼亦似逃名。
可知枚馬元同調，誰見千秋出處情。

南海歐生自京師遺書于大梁屬許右史為致
荅此

中原才子動相聞誰復高名得似君南海一珠懸北斗
黃河雙鯉墮青雲城邊五色羊何在臺上千金馬不群
獻賦幾年猶未遇羅浮春思坐氤氲

送魏按察之潞

壺關上黨切雲霄憲府中天插漢標山勢西臨三晉險
地形東控兩河遙名從出守高郎署策本和戎寵聖朝

盡道疆場懸節鉞猶能書札滿漁樵

送崔明府之宿遷

山陽列郡接青徐宿子中開百里居自是燕臺求駿馬
飄然淮海駕蜚魚邑因美政花相似今有文名錦不如
共理即今明主意憐君指日捧徵書

題李水部恩榮卷

自奉天書出建章明時誰不羨仙郎五雲偏借斑衣色
列宿遙含畫省光水部盛名懸楚望南山佳氣入高堂

鹿門咫尺龐公宅那見恩波繞漢陽

送賈明府以徵入遷

茂宰能名海岱聞更推經術起河汾即論展驥無千里
果爾飛鳬便五雲烏府風霜秋正急黃門供奉日為群
徵書十道求高第治行誰人不讓君

送郭子坤別駕之廬州

諸生垂白困談經何似雄飛出漢庭客自燕臺知驥足
人從金斗識屏星耆闍海外來峰色大蜀淮西擁地形

匣裏佩刀誰所贈
龍鳴風雨未堪聽

其二

吳楚西南郡
閣重廬江小吏日從容
濡須不是天河水
霍嶽爭齊紫
蓋峰京洛仙舟飛似鷁
并州竹馬健如龍
已知家世多名士
難道明時可易逢

許殿卿擢左史

萬里襟帷逗主恩
長裾一再歷寒溫
諸侯賓客梁園盛
帝子官僚相國尊
誰為從旁驂駟馬
自應虛左過夷門

况兼詞賦凌雲氣漢署風流可更論

九日登樓

白鴈黃花處處秋
鮑山風雨獨登樓
忽驚返照湖中出
轉見孤城水上浮
多病恰堪成卧隱
濁醪真足抵窮愁
先生懶作東籬會
可但交情老自休

青州志成薛生重枉報別將詣元美作此為贈
於越諸生稷下來
梧宮重起讀書臺
薛君世業推經學
齊客家傳讓史才
北海風流天上座
雲門秋色鏡中開

菰蘆更有人相問為道登龍御李迴

青州志成贈杜使君

使君經術有餘師元凱家傳左氏辭東海大風回騁翰
少陽寒色動褰帷按圖冠帶還千里問俗春秋自一時
況是郡城常下鳳文章無似羽毛奇

題南海栢臺甘露贈潘侍御

二首

繡斧光清瘴海雲行臺甘露栢紛紛九天驄馬人爭避
五色神羊氣不群白簡風生偏起粟阜囊秋淨總垂文

侍臣宣讓東方朔千載芙蓉奉聖君

其二

蘭臺使者憶長安萬里雲霄攬轡看忽報三危開玉樹
誰分雙掌注銅盤霜凝合浦明珠出風動增城瀑布寒
清節滿朝君不信流光偏綴惠文冠

題潘廷尉留餘堂

前朝知政四留餘廷尉為堂取自書潘令官衙猶散騎
于公門第早容車法星傍斗懸高座佳氣如雲護直廬

海內稱平逢此日主恩先已未應虛

子與自蘆臺量移瑞州

二首

題坐高名漢署來魚鹽小吏混蘆臺誰憐汝海分符客
自是南皮作賦才老驥霜蹄千里動佩刀寒色九河開
量移休道非知遇難得君恩一日回

其二

遙傳雨露一時新不負漂零戀主身高卧中原堪有客
雄飛爾輩可無人屏星色動雙龍曙錦水光分五馬春

詩興宦情堪並美南州孺子況為鄰

得元美馮參政書知王沂州先已失寄

搖落中原伏枕時故人千里一相思
雙魚不滅加餐字五馬虛傳遣吏辭
我在河山終未邈書來雨雪自堪遲
從今把酒登樓處數子江湖會有期

答寄敬美

君家鴻鴈滿江干歲杪逢人一字難
白雪似應工伏枕青山好在重加餐
卷中雙玉清相倚掌上千金笑獨看

兩地起居俱不惡風塵回首任漫漫

寄題元美藏經閣

宕堯飛閣大湖傍有客繙經日滿牀
白馬尚留霜練影彩毫應帶雨花香
當年張掾生秋興何處丈公坐道場
君自風流兼二子吳門極目正茫茫

送歐文學之江都

雨雪寒燈對濁醪蕭然似是一儒曹
下帷國士堪華髮草檄門生自彩毫
雙峽迴分滄海氣孤城秋壯廣陵濤

文星雖小人爭識南斗常臨劍影高

寄張幼子

吳門風雨洞庭陰上客常開子墨林
劍閣自題名更起鱸魚一憶興何深
古今不改中原色南北相看萬里心
愧我驚人無俊句勞君寫入二龍吟

白雪樓寄懷徐使君兼呈元美

木落清河入檻流平陵月出照牀頭
開樽自動青雲色掩卷俱含白雪愁
南國佳人能命駕中原病客此登樓

從他不淺山陰興遠道無因報子猷

秋日寄懷元美兼呈吳徐二使君

十載江湖白露寒因君萬里憶長安故人相向中原老
秋色何如畫省看邵武功名非不佞汝陽經術雅能官
即今垂作漂零客可道音書日轉難

寄題況吉甫藥湖別業在荷山下

湖上高齋萬木齊白雲長在楚天西落霞一散燒丹火
秋水遙通濯錦溪伏枕自來詩不廢扁舟誰為酒同攜

南峰盡作蓮花色曾是王喬隱遁棲

荅寄余德甫

二月鴻書發豫章到來春興日能長宦情轉借中山篋
詩句猶舍石省香海內故人元落落江南秋色正蒼蒼
遙知相憶登高處更過陶家醉不妨

寄謝俞仲蔚寫華山圖

雲臺隱者二茅龍曾道神仙自可逢忽爾畫圖開萬里
居然秋色在三峰貪看塞外黃河下坐失關門紫氣重

況復題詩如謝朓當年却恨不相從

奉贈杜使君寄上太翁八十壽

越徵春生戲綵天風流耆舊楚先賢
青州五馬分符日渭水非熊入夢年
一自趨庭經術就還應託乘帝恩懸
即今南極長朝斗並照明珠北海邊

秋夜白雪樓贈周公瑕

日落風清竹樹林一樽飛閣敞秋陰
繞逢狗監人先老能到龍門客自深
海上共懸明月夢山中堪贈白雲心

陽春寡和休言誤此夕因君作楚吟

登華不注山送公瑕

鴻鴈高飛木葉丹逍遙臺上一憑闌浮雲不動孤峰起
落日長臨二水寒多病故人書未達中原秋色醉相看
預愁匹練江南道極目吳門駐馬難

題周天球小象

落魄吳門五十春嬾從高閣畫麒麟此中墨客爭知妙
何處詞人更有真白眼自宜置邱壑紅顏元不染風塵

東牆休掛喬家女夜恐周郎作後身

贈吳人梁辰魚

迢遙岱嶽海漫漫秋興如君未易闌
三觀雲霞天上坐蓬萊宮闕掌中看
纔探綠綺陽春動一說千將紫氣寒
詞客吳門誰不羨王家兄弟雅盤桓

寄謝許左史刊倡和集

平臺左史寄相思開卷風流見往時
已自遊梁詞賦長翻因御李姓名疑
玄經竟為何人出郢調除非和客知

君有明珠堪照秉更煩清影及茅茨

舜祠哭臨大雪

雨雪號天慘曙暉君王千載一垂衣
廷中左鉞將軍出海上樓船使者歸
紫氣不隨江漢轉白雲還傍薊門飛
孤臣賸有蒼梧淚逐客瀟湘在亦稀

答寄子與時自蘆臺移瑞州按察山東

北風飛雪擁南奔苦向綈袍掩淚痕
病客世疑中散傲故人官起外臺尊
尺書萬里存交誼一歲三遷見主恩

月出登樓如匹練每依吳觀望吳門

於白雪樓送龔生入貢

樓上春陰動曉寒
薊門千里入憑闌
別來白雪還誰和
老去青春好自看
天子今逢新禹貢
諸生不改舊周官
臨軒若問羊裘客
莫道江湖有釣竿

杜青州按察楚中

東方千騎古諸侯
憲府新開大楚秋
北海清風猶滿座
武昌明月更登樓
五雲過郢朝佳氣
三峽吞江擁上游

此地功名誰得似君家元凱自荊州

寄別元美

誰憐伏闕上書還國士銜冤動帝顏
殺氣始應高碣石飛霜猶自滿燕山
風塵雙淚綈袍盡湖海扁舟白髮閑
却念十年攜手地不知春色在吳關

答元美山東道中見寄

飛來尺素九河陰報道春光滿上林
游子自矜年少好故人無恙歲寒心
即今病借青雲起何用詩傳白雪音

處士一星依帝座兩朝誰似主恩深

荅元美廣川道中見寄

檄書遙借薊門看只尺平原一笑難便道何妨留作客
他家惟願起為官雙龍夜敞星文動匹馬秋深嶽影寒
杯酒可知公子意空懸十日布衣歡

荅王敬美廣川道中見懷

薊門秋色夢中偏二子乘舟下廣川食客未應常在趙
酒人誰復並遊燕心知老驥元千里目送歸鴻自一天

已分蓬蒿能興盡壚頭春酒却堪憐

答寄俞仲蔚兼呈元美時不果枉因有末句

濁酒新開綠綺鳴白雲湖上掩柴荆興來陶令還辭社
老去龐公不入城一疏中原高病色千秋吾黨見詩名
故人徑作書相別握手看君負此生

寄懷子與

白雲愁色滿秋天海上離心鴈影傳那堪對酒書相憶
況復登樓月正圓自爾一攜龍劍合何人更問鵑冠篇

莫言十日平原飲不是王孫得意年

殷洗馬誕子值今上登極日

詞臣三命侍經筵聖主龍飛薊北天
珠借星辰堪並出弧隨日月更新懸
一毛深照銜圖夜千里長懷托乘年
共訝玉堂分氣色蕪城重喜得藍田

寄賀天官殷少宰

十載詞林供奉中史才經術並稱雄
恭承三命銅龍署無典諸儒白虎通
要地持衡當北斗清聲曳履入南宮

猶言紫極氤氲處非復文昌八座同

答寄劉子威侍御

首二

吳客械書問轉蓬姑蘇臺上起秋風
七星已佩干將劍五色還乘鮑氏騄
江海雙懸精自合陽春一曲步逾工
只今曾照西施月多少娥眉畫不同

其二

憶昔風雲滿帝鄉同時射策向明光
一毛宛在中書日匹練遙飛御史霜
北海清尊開岱色西京彩筆照河梁

非君尺素三江下爭得秋聲入鴈行

顧中翰祭告德衡二藩無有事沂山東海

聖主新恩北極開侍臣銜命出燕臺三齊茅土星潢近
二國松楸雨露回百丈自天垂瀑布五雲佳氣接蓬萊
俱言海嶽遊偏壯為有王褒作頌才

送郭使君解郡暫還豫章詩有序

公之難去郡百姓郡百姓之難去公猶之免
赤子於懷也斯古遺愛焉不獲乎上民不得

而治矣不曰直道而事人焉往而不三黜哉
惟是帝命維新舜有天下選皋陶於衆危言
危行是以論其世也重選而厚望之相與以
成其後者乎

春風解郡豫章還已報徵車起漢關儘怪雙龍高紫氣
何妨五馬照朱顏門人榻自南州下座客樽應北海閑
似是朝廷知借寇先開書篋慰中山

送都轉運劉使君還萬安有序二首

使君之在西省與僕甚驩久不聞問轉運山
東時某杜門十載矣哀宗梁之悠悠感王徐
之常勤抵掌於同舍之役也使君司寇世家
仲氏入拜九卿季子出二大郎是稱難兄再
領國課厥聲卓然尋以舊守常德誤中掇拾
當路惜焉顧使君之在西省不少假一冢宰
掾即風采可知矣

使君漕輓山東回天子金齊外府開海王至今餘伯氣

大風千古見雄才
魚梁忽落雙江水
白石遙分萬里臺
更廣絕交成妙論
可無人識孝標來

其二

十年西署結交驩
別後雲霄尺素難
郡接荆衡分岳牧
場開海岱領鹽官
五溪誤見明珠拾
千里誰將老驥看
莫道賜環非近事
新懸白日照長安

荅元美吳門邂逅于鱗有贈

四首

姑蘇城上倚高臺
却望中原酒一杯
彼自有人浮海去

我今為客渡江來飛龍忽報干將合老驥還驚匹練開
共向風雲論二子誰知天地此徘徊

其二

徵君巖穴雅能深出處人間總陸沉流水乍含鍾子調
浮雲不繫邴生心關門紫氣長來往海上青山更古今
世事彈冠難自料風塵容易是抽簪

其三

萬里風雲北極生中原二子舊齊名居然霄漢雙封事

自是江湖一宦情
天借客星高物色
歌回春雪壯潮聲
何妨邂逅成佳會
正復相思命駕行

其四

雪滿江城醉色寒
蕭條春興入彈冠
自憐滄海雙珠合
誰作青雲一鶚看
日月祇銷高伏枕
風塵何事老投竿
宣宜梅福吳門在
共說先朝吏隱難

過嚴陵

嚴陵物色動新年
解纜春回七里船
繡嶺更宜殘雪映

釣臺高並客星懸灘聲乍合三江壯山勢遙臨百越偏
此日青陽瞻帝座羊裘深愧昔人賢

題候濤山觀音寺寺徒自落迦

落迦山上古祇林白馬西來峽口深月出爾時樓閣影
風還如是海潮音若非鸚鵡元能語誰解蓮花不染心
五十三員知識盡可勞踪跡問浮沉

大閱兵海上

四首

使者乘輅大閱兵千艘並集甬甸城騰裝殺氣三江合

吹角長風萬里生
帳擁樓臺天上坐
陣回魚鳥鏡中行
不知誰校昆池戰
橫海空傳漢將名

其二

戈船諸校錦征袍
水戰當場命客豪
萬櫓軍聲開島嶼
千檣陣影壓波濤
赤城深泛旌旗動
射的遙銜竹箭高
東海便應銅柱起
何妨馬援是吾曹

其三

列艦如城積水前
援枹擁棹出行邊
桔槔氣迸流烏火

組練光搖太白天鵝鶴一呼風雨集
鼉鼉雙駕斗牛懸
即今萬國梯航日並識君恩浩蕩年

其四

新開帷幄控朝宗萬里波臣老折衝
海氣抱吳遙似馬
陣雲含越總如龍中流鼓應潮聲疊
下瀨戈回日影重
自有長纓堪報主誰言白雉竟難逢

元美起家按察河南寄促之官

莫道漁樵計已安主恩堪為一彈冠
足知上國羣公疏

猶作中原二子看
虎觀迴連窩少起
龍門高倚大江寒
與君聊玩人間世
明日抽簪未是難

答贈王給事

漢帝風流盛栢梁
一時才子羨為郎
歸來東海桃三熟
諫罷金門草數行
謫籍祇今人欲盡
除書何意客相忘
黃公雖道商巖起
家本鄆山是故鄉

二山人孤山吟社得菲字

西陵樹色澗斜暉
一片仙舟拂練飛
三竺漸從天上落

二峰高入雨中微人今湖海開詩社客自雲霄奉禁闌
綵筆如花誰不羨敢將春興鬪芳菲

靈隱寺同吳馬二公作

武林臺殿敞諸天建自咸和第幾年繞到上方雙澗合
飛來何處一峰懸梵音動雜江潮轉燈影長含海日傳
所以龍宮稱絕勝驪珠交映使君前

和馬侍御賦得飛來雙白鶴

三花珠樹五雲開海上雙飛白鶴來借問分行棲玉署

何如對舞映霜臺月明華表聯翩起雪滿緱山並駕回
萬里只今誰比翼仙禽原自不群才

和馬丈見送廵海之作

樓船遙指越王城萬里波濤按部行門下有人惟說劍
江南何處不談兵長纓我媿山東妙銅柱君懸海外名
忽訝天台霞色起開城彩筆更縱橫

煙霞嶺

煙霞不隔洞天遙佛影千巖散寂寥絕壁倒銜滄海照

一峰高映赤城標白雲家在時堪駐紫氣山深夜自朝
莫被藤蘿迷出入相逢終日少漁樵

董生寫四子圖

客星遥犯洛陽宮帝座雲臺路已通君自一毛求駿馬
我將雙眼送歸鴻青萍交映千秋色玉樹長含萬里風
不是弟兄江海上誰堪綵筆與爭雄

九里松圖為馬侍御作

二首

三天嘉樹儼成行下接粉榆即故鄉遠勢不隨雙澗盡

層陰並落二峰長
葉棲金掌仙人露
榦挺烏臺御史霜
孔雀東飛煩再顧
欲從威鳳託清光

其二

武林佳氣日蕭蕭
夾道長松入望遙
黛色總疑天目雨
寒聲不辨浙江潮
含淒風自枯鱗起
倒影雲隨偃蓋飄
非值有心同竹箭
箭懸蘿爭敢附高標

按察李公誕子公蜀人先以中書舍人為御史
高才染翰五雲中
復道登車攬轡同
雖有一毛殊是鳳

駒無千里不為驄名鳥業已承家學字天文堪命國工
君自蜀人揚馬在同鄉奕葉播清風

贈李封君蕪訊長君進士

五陵群少各賢豪客有能詩調獨高受業不隨秦博士
為文無害漢功曹十年我輩慚龍卧萬里君家起鳳毛
江左衣冠堪此地美名如昨照同袍

高光州孤山精舍

白雲不散一山孤地主人稱楚大夫老作西陵詩社長

可攜南部酒家胡囊餘太古雙龍劍壁有行春五馬圖
汝頽過逢遺事在高陽似此聚星無

答龔茂才

中原相望兩漫漫傲吏重彈柱後冠不盡青雲東嶽氣
飛來白雪大江寒人今雨別千年事君自風流二仲看
若問嚴陵灘上月小清河北照漁竿

毛封君

公家安在薊門城出入漁陽結客行經學並驅韓太傅

辭華脫穎趙先生大人不作雄邊老令子還高秉憲名
此日夜冠看甚偉也知黃綺負餘情

和吳太常南樓煙雨之作

南樓迢遞俯丹梯烟雨蕭條拂檻低越徼層陰千里合
吳門春樹萬家迷江流欲動帆檣外山色纔分睥睨西
一自不齋多暇日新詩誰與醉同題

送周給事還朝

二首

才子先朝侍從年東山一卧主恩偏彈冠便借風雲起

補袞新看日月懸
疏動龍鱗成五色
名聯騎省映羣賢
當時諫獵還誰在
聞道長楊賦已傳

其二

纔疑仙吏在人間
萬里乘風復漢關
三殿不緣春色滿
五雲爭識歲星還
朝陽更王清華氣
金馬依然供奉班
未許陸沈如昔日
須君持論答天顏

送勞少參提學蜀中

分藩吳越氣雄哉
人自南宮出上台
一抱連城明月滿

還看三峽使星來錦江波動詞場色劍閣高臨憲府開
聖主賢臣今日事王褒門下本奇才

汪中丞臺火救者獨以劍出彈鋏而歌和以相
弔

中丞臺火照閩方客有千金劍一裝賴是龍蛇先自起
忽然風雨為深藏逃形疑入延津水厭影猶含北斗光
報國片心還獨在逾看鱗甲動冰霜

為南海鍾侍御題金臺遙祝卷

二首

游子承恩出禁闈，高堂華髮照春暉。
潘與自不隨驄馬，萊綵何妨舞繡衣。
江鯉一從天上寄，臺烏長繞日南飛。
即今婺女遙相望，柱史星光近太微。

其二

冰霜不厭北堂清，冠指神羊海上城。
戀闕未須將母疏，倚門元自望君情。
家傳五字推承學，朝擁三臺起令名。
驄馬更便千里駿，還鄉實切斷機聲。

送張閭使黔中


虎臣推轂滿長安吳越當朝聞外難君自雅歌稱坐鎮
人疑漢將不登壇江潮常借軍聲壯海氣遙臨陣影寒
滇水一珠堪照夜誰憐薏苡竟同看

贈海憲蔡公開府

橫海今時領外臺書生謾說請纓來霜威瘴癘三山盡
殺氣波濤萬里開攬轡本朝元楚望談兵當代一邊才
朝廷近有留中疏柱史星光切上台

送陸從事赴遼陽

御苑東風吹客過共看芳草有離珂
西山晴雪鴻邊盡
北海春雲馬上多地險時窺玄菟郡
天驕夜遁白狼河
知君幕下參高畫諸將何時議止戈



滄溟集卷十

欽定四庫全書

集部
滄溟集卷十二

詳校官無吉士臣柳邁祖

中書臣劉源溥覆勘

覆校官中書臣朱鈐

校對官庶吉士臣嚴福

謄錄監生臣劉耀馥

欽定四庫全書

倉溟集卷十一

明 李攀龍 撰

七言律詩

送王侍御按貴陽

中原遙入楚天長，道出盤江古夜郎。
自許鐵冠衝瘴癘，兼攜白筆掃風霜。
百蠻擁節開雄鎮，萬里登車擊大荒。
莫說壯遊非妙選，同時八彥避鵷行。

郭吏部請急歸吳稱壽封君太宜人

水鏡清光滿薊門庭闈雙映一寒溫角巾入洛名元重
裘褐依梁道並尊白首更偕吳市隱青雲再奉漢宮恩
還朝益妙題才術湖海微言可具論

武太常貞母太常是遺腹子

令子清標領太常持衡東省舊為郎才因藻鏡知秋水
胎本明珠產夜光天上旌旂懸日月人間竹帛映冰霜
雖然燕趙多奇士已讓高風在北堂

戲擬王安人稱壽郭相國相國嘗為廬江別駕

南山高唱入新題曲罷蛾眉玉盃齊秦史自偕嬴氏女
廬江誰憶仲卿妻雙飛青鳥披雲下並蒂蟠桃帶雪攜
何必千金稱上壽嫣然一笑醉如泥

秋前夜過崑山寄仲蔚時元美兄弟俱就徵車
有客中原回白頭懷人千里命扁舟吳門山色元非雨
婁子江聲似是秋二友鴈行堪入洛惟君龍卧不依劉
也知傾蓋須臾事一日緘書即舊游

上朱大司空

二首

重華冀北再開天
監佐山林涉大川
四岳受成方貢日
三邊仰給縣官年
黃金不及隄形壯
白馬長隨練影懸
轉自流言能悟主
老臣知遇兩朝偏

其二

河隄使者大司空
燕領中丞節制同
轉餉千年軍國壯
朝宗萬里帝圖雄
春流無恙桃花水
秋色依然瓠子宮
太史但裁溝洫志
大人何減漢臣風

送徐子與之武昌

首二

使君安在武昌城江漢雙懸憲府清共許登高能作賦
不妨秉暇一論兵脩然白雪千人和颯爾雄風萬里生
更憶南樓明月好欲攜佳興與縱橫

其二

刺史樓臺望裏重是時門客羨登龍白雲三署還堪起
黃鵠千秋更可逢象合星辰雙執法心隨江漢一朝宗
二天尊寵諸侯上出處何論邴曼容

和子與過訪平原道中值雪二首時按察楚中

九河風色報褰帷
道入平原雨雪遲
天欲並傳梁苑賦
君今試和郢中詞
憑陵尺素光猶動
縹緲扁舟興可知
况值如澠春酒熟
好來投轄未須疑

其二

平原日映北風斜
飛雪偏隨刺史車
明月更投公子邑
金門何處侍臣家
綈袍忽自生春色
彩翰紛然擁落花
為報袁安高卧起
齊宮上客有田巴

皇太子冊立入賀

燕臺依舊鬱相望玉樹金莖是帝鄉鳳闕雙懸雲五色
龍樓交映日重光九天氣王旌旗動三殿風清劍佩長
伏謁不違顏只尺十年西省愧為郎

江上贈郭第歐大任

元年飛雪度維揚此日秋風復故鄉總為郭君紆綵纜
況逢歐冶說干將回看京口孤城轉坐擁江流萬里長
以爾相從諸子後新知得似丈人狂

吳使君自邵武之高州

二首

先朝五子結交情一日青雲滿鳳城漢主憐才金作署
楚臣能賦玉為名已應龍自延津起那更珠還合浦生
直置壯遊消不得纔無遷客重縱橫

其二

中原五馬日駢駢嶺外翻傳俗更稀逐客也須常作好
使君安見遠游非庶無疾病堪乘興況有登臨可當歸
漂泊秋風同一葉幾時還向洛城飛

早春元美自大名見枉齊河

時元美代
余浙中

如此春醪醉莫辭中原攜手即佳期何人命駕能千里
與爾彈冠又一時嶽雪故應回匹練江潮今復借褰帷
比來慷慨悲歌地河朔風流更有誰

與子與游保叔塔同賦

山有落星
石二拳

古塔松臺對寂寥高齋斜日傍漁樵金牛忽見湖中影
鐵騎初回海上潮更倚連城明月動並攜雙劍落星搖
若非賦有凌雲氣筆底天花可自飄

和梁憲使過密咏天仙宮白松

是黃帝葬
三女處

孤根一託蕊珠宮不與苔華粉黛同夜暗龍鱗銜自照
天清鶴影望來空條封姑射千秋雪蓋擁蘭臺萬里風
非為子雲能作賦誰知玉樹本青蔥

其二

軒轅宮裏試新妝縹緲連枝入帝鄉玉骨不緣能化石
冰肌那得便生香只愁明月銷為水更恐清陰凝作霜
巫峽瑤姬元素質却令雲雨污衣裳

其三

玉女窻前手自裁
遙分海色向蓬萊
唯應七聖襄城過
曾見三花少室開
地迴流光通粉署
天寒老幹倚霜臺
懸知的有千年露
欲獻須君作賦才

荅寄用晦王孫

二首

江上傳書錦字斜
于時飛雪映瑤華
誰攜雄劍非豐獄
但出名駒即漢家
春色自憐彭澤柳
美人相怨武陵花
三年未報平安使
長日心懸萬里槎

其二

豫章城上有高樓樓下長江二水流君更紅顏雄製作
誰同清夜美遨遊陽春若許千人和明月何須萬里投
不信祇今求自試詞場可但少應劉

荅寄元美

飛書若水報王孫杯底黃河似酒渾已讓五湖相代長
敢臨中嶽自言尊人無西子堪同載客有如姬不負恩
蕭索三餘回王氣風塵非復古夷門

寄懷蒲圻魏使君

三首

赤壁黃磯錦不如
故人家傍武昌居
蒲生太守裁鞭後
竹擁郎官賜管餘
遣興幾篇司馬賦
銜冤一紙樂羊書
楚材堪已推三晉
那得長懸刺史車

其二

歸來高卧叔牙山
恰爾分符出漢關
一顧青雲生海上
千秋白雪在人間
非時按劍投珠起
無意償城抱玉還
所以離騷長苦怨
楚臣容易老紅顏

其三

搖落誰憐作賦才
高秋無處不悲哉
大王自嘯雄風起
神女長攜暮雨來
非有上林吞夢澤
至今江漢遶蘭臺
武昌月滿南樓夜
安得青樽共我開

東陂同許殿卿陸南道函灌甫兄弟賦

散髮東陂月滿庭
王孫春草鴈池青
平臺吹合風先起
竹苑樽開酒旋醒
自媿長卿工作賦
誰憐子政老傳經
明朝莫報高陽會
不定江湖是客星

勤中尉園亭

分竹穿苔暑自平披襟小閣坐來清使君河上浮槎興
公子夷門結轡情自有明珠堪照乘豈無佳色解傾城
時人若問游梁客司馬相如字長卿

聞肖甫已代元美大名有寄

褰帷蜀道望吳天二子瓜期迴自憐五馬過逢曾此地
雙鳬飛去復何年誰言官合談兵起爾已名從作賦傳
父老未須窺露冕何人不識使君賢

贈劉將軍

憶醉卿家春草芳
征輶信宿向漁陽
行間舊識千夫長
轂下新推六郡良
白馬從軍明月塞
黃金結客少年場
何時更出追風騎
策爾持纓請建章

送羅大參之任山西

二首

鴈門句注九關通
地接燕山帝業雄
使者汎舟從絳水
將軍轉餉入雲中
分藩忽壯朝廷色
開府深懸保障功
晉國莫強兵馬地
股肱何但數河東

其二

吏部風流入奏年諸郎誰不讓朝天五雲忽映檐帷動
雙轡重臨水鏡懸色借綈袍堪病起詩更藻筆已名傳
故人剩有河山在二子相逢海岱前

五言排律

送固始申明府還縣

百里絃歌邑春風獨在茲旋歸瞻日遠留借見天私復
送仙鳬去言趨竹馬期渡河蠶月早行縣麥秋遲楚國
先賢傳梁園上客詞知君才不忝遙以慰相思

送李太守之東昌

諸侯辭北極，千騎向東方。
十二稱天府，風煙接帝鄉。
地形來海岱，漕輓自徐揚。
春滿弦歌邑，花明太守章。
射書延上客，照乘得高唐。
寇息解刀劍，人和下鳳凰。
軒帷褰雨雪，郡閣卧星霜。
治行兼經術，諸曹借寵光。

送宋宇少府之蒲城

別離有楊柳，折贈擬琅玕。
古道千人失，時才一尉難。
清秋開少府，紫氣指長安。
梅福稱仙仕，蒲城得吏歡。
河聲

公檄靜嶽色訟庭寒鴻鴈雲中出芙蓉月下看三秦至
豪傑兩漢數衣冠馮翊今遺邑何輕佐幕官

答謝生盤山詩

愛爾躋攀處竒踪滿報章山盤元氣出寺抱翠微藏拂
石搖天影披花帶雨香千峰回白首萬壑步清霜鼓角
關榆墮旌旗塞草長陰風來大漠秋日下漁陽海色秦
城外邊聲漢苑旁欲因臨望代遂得紀金湯

送楊給事河南召募

邊衆休南牧朝廷議北征幄中新授律天下大徵兵使
者持符出君推抗疏名黃金秋突兀白羽日縱橫嶽雪
三華秀河水萬馬行將軍邀劇孟公子得侯嬴屠販多
豪傑風塵鬱戰爭有呼皆左袒無役不先鳴寧久燕山
戍終期瀚海清過梁投賦筆更為請長纓

送林章之郎中謫獄南海

舊識于公傳新知陸賈才漢章雙鳳下越郡五羊開旌
節看山駐樓船截海來長安天北望使者日南回訟府

蒲堪掛刑書竹可裁明珠滿合浦應照不然灰

送祠部莫郎中貴州提學

薊門一相送楊柳未堪攀亦是文章地寧虛供奉班
西南天欲盡羌笳日多艱鼓棹過三楚傳經到百蠻
春雲蒸赤水秋雨瘴青山早就中和頌諸生憶漢關

題歐職方鵠山泉高齋

聞君讀書處乃在薊山阿水色開窻檻泉聲散薜蘿
濯纓秋雨至把釣夕陽多白壁澆田出寒流沒羽過風塵

無燕息賓客有羊何一自從王事空為勞者歌

集元美宅送汝思吳峻伯袁履善三比部

別賦吾能作還銷客子魂上林又黃鳥何處此青樽帝
念徵兵日人銜祝網恩星榆散使者春草待王孫子役
分江徼相思共薊門風塵異南北莫向鴈書論

賦得邊馬有歸心

飛將驅天廐乘秋踏大荒三軍呼驃騎一戰蹶名王急
難才堪老橫行勢可當嘶聲悲漢月顧影淨胡霜總轡

陰山上鳴鑣瀚海旁何如春草色躑躅向長楊

得殷卿書兼寄張簡秀才

久客疎歸計吾徒足醉眠風塵猶逆旅服食豈神仙老
母須微祿郎官亦冗員時名非我意詩句衆人傳雞肋
堪誰棄蛾眉幸自全羈情驚歲晚法署向秋懸竊笑吹
竽濫深慙抱甕賢青雲浮世外白眼貴游前流俗終違
性佯狂始入玄所甘才太拙敢望病相憐寄字存加飯
興言問着鞭支離如昨日飛動異當年直覲亡殷社殷

憂切御筵逐臣收佩玦大將與兵權報主謀安出和戎
議已偏乘輿空汗血錦繡被貂蟬帷幄今何事京師未
晏然乾坤多壘後仕宦畏途邊海岱生瑤草朋從拾紫
煙伊余方物役回首薊門天

七夕集元美宅送茂秦

祖席陳瓜果征衣理薜蘿雲邊看露掌花裡出星河仙
吏揮金碗佳人罷錦梭新知天上少秀句鄴中多疎拙
時名棄歡娛鐵騎過秋風吹鬢髮落日渡滹沱七首荆

卿贈刀頭桂客歌明年見牛女能不憶羊何

碧雲寺

飛塔標龍藏長橋挂虎溪五王開壯麗二梵樹菩提淨
土黃金布香臺碧漢齊經過初地變徙倚上方迷杖底
籠清磬崖間散御題屢疑窮紺宇復道出丹梯天樂蓬
萊近祇林日月低水流僧舍下雲起佛堂西深愧雕蟲
技難同怖鴿棲慈燈懸廣劫處處得摩尼

香山寺

往時占紫氣馬上看香爐不是尋幽到其如發興孤迴
標臨北極秀色攬西湖樹杪諸天出堦前衆壑趨花臺
騫地起風鐸蔽簷呼月抱蟾蜍石星搖舍利珠玉毫侵
瀑水金相湧浮屠妙偈傳從竺高僧至自胡法輪皆帝
力下界復神都行幸當年事人王握大符

經華嚴廢寺為兵火所燒

往事殊猖獗諸生坐播遷無方超寂滅有地入烽烟境
壞秋原上門空暮雨邊虛聞金作粟真見火生蓮星影

疑纓綴雲光學蓋懸焚身香象泣照鉢燭龍然莫辨沉
灰劫猶傳喫酒天至今餘淨土不復一燈傳

人日同元美子與公實集子相宅得寒字

年華開此晏春色又長安得日人相勞披雲客共歡貼
屏皆綵勝佐酒尚辛盤北鴈先花發西山過雪看文章
投壁盡心事斷金寒不但蕭朱輩論交自古難

初春

四首

物色看如昨愁時獨不醒春陰含雨白日氣宿靈青國

士紆三表王師壓二庭獻俘當祖社制勝本朝廷使者
行飛輓將軍議勒銘誰憐劉子駿心事有傳經

其二

橫海樓船下平胡羽檄飛五雲高王氣三殿敞春暉卜
相數文命徵兵出武威風塵終混合日月此瞻依薄宦
無工拙浮名有是非陸沈吾豈敢疎懶世人違

其三

使者歸朝疏將軍捕虜才乾坤百越震烽燧九邊來國

步艱難過天顏
貽蕩開紫宮
春窈窕華省日徘徊
白石飯牛客
黃金圖駿臺
終看成遇合
未可怨無媒

其四

薊北看春色
羈情坐鬱然
官猶膠柱在
名豈濫竽傳
汨沒終何事
文章自有權
薄遊多難後
知己衆人前
踈拙容高枕
風雲讓着鞭
客嘲安用解
執戟至今憐

五日同子相遊天寧寺

四海攜名士
彌天得上方
綵絲還令節
白馬自開皇
揮

拂靈花裡攤經祇樹傍燈輪侵日出塔影入雲藏淨土
殊幽事清齋復妙香幻知看絃冕靜欲厭詞章薜荔來
風雨杉松接渺茫人間空競渡未解問慈航

立春日示子與

舊遊離別盡病客尚文園此地看春色唯君大雅存揮
毫當北斗握手向中原夙昔為郎意平生知己恩紫氣
臨燕塞青山擁薊門豫愁分袂日花裡倒芳樽

燕京篇

燕京豪俠地杯酒為君陳雙闕西山下諸陵北海濱
門行雨雪泰谷變陽春騶衍初臨碣荆軻故入秦黃金
來駿馬白璧售佳人定鼎還先帝千年正紫宸

哭陶侍御

伏柱稱仙吏彈冠即諍臣逢時隨八彥攬轡屬東巡
抗疏惟安漢危言屢借秦寵光回造化正色上星辰
夢已摧高翼災非批逆鱗孤臺遙向夜五柳黯傷春
白鶴還來客青驄豈避人朝廷存折檻道路指埋輪
擊隼才何

健神羊氣不馴分陰空自惜浮世轉難陳風裁登車罷
霜華掛劍新群烏哀就老列栢米為薪鬱鬱匡君意飄
飄出使身廬山彭澤外落日九江濱

哭公實

六首

逝矣梁公實清時隱漢關扁舟浮大海健筆誌名山豈
悟風流盡猶言洗沐還文章憎白髮服食誤紅顏禪草
來天上玄經出世間縱為華表鶴羽翮已難攀

其二

客有燕山至傳君喪海隅含香情不厭辟穀事還迂詞
翰家長技經綸國大儒天心曾爾輩雪涕自吾徒精氣
乘朱鳥浮生過白駒所悲無舊物此道失前驅

其三

實沈其爾崇單閼乃為灾偃蹇非關病文章未盡才他
人紛項領之子渺塵埃白日中原墮高秋大海迴自逢
雙鶴至誰叱五羊來欲掛延陵劍風雷不可開

其四

一虛郎署問竟負帝鄉期此日名堪定千秋事可知賦
寧為異物人已不同時垂白君應妬還丹我自疑索裝
高卧盡椎結舊遊悲坐識藏舟理行令荷鍾隨

其五

從此微言絕何當大夢醒人間矜意氣地下鬪精靈虛
室還生白遺編竟殺青浮名流景過夫子望秋零同舍
悲離索投詩哭杳冥山陽風雨夜鄰笛未堪聽

其六

嶺南秋慘淡海上日蕭森不王衣冠氣云亡雅頌音操
斤臣質少題柱主恩深此物何陵替斯人乃陸沈衆方
疲道路爾欲久山林所以生芻贈終難託素心

郡齋同元美賦得高字

風塵如昨日千里得同袍秋色隨佳句浮名避濁醪故
人滄海遠使者白雲高小郡常懸榻君家自佩刀飛揚
鞭弭約慘淡簿書勞別後看多士元龍未似豪

宿華頂玉井樓

二首

玉井通溟海朱樓冠削成波傳潮汐到檻接斗牛平虎
魄侵燈出蓮花傍枕生拂盆雲髮暗映掌月珠明犯座
人間象浮槎世上情不愁更漏絕石鼓自能鳴

其二

不寐芙蓉冷幽棲薜荔驚靈胡秋鬢鳳毛女夜妖精暗
穴龍蛇走深林虎豹耕星連碁石布雨共洗盆傾霜絕
千尋鎖風邀五舌笙豈因臨帝座呼吸變陰晴

冬日王給事出示許中丞苦熱詩卷

最秀中丞句尤奇苦熱篇開函迴白雪展卷失寒天硯
石猶堪礫壺冰豈自堅蠹魚冬不蟄螢火夜應然才是
洪鑪縱名將汗簡傳歌來探綵扇寫罷撤青氈藻筆還
生色雲箋更雜烟五言如挾纊一字解纏綿病暍南風
後魂銷大雅前霜臺三十載就日片心懸

和殿卿咏梅篇

忽報探梅句深知水部賢空梁流漢月寒色動江天影
落青樽裡花生彩筆前新妝綦素練白雪洒繁絃南國

書堪寄春風病獨憐更慚清思減不及兔園篇

為魏使君送黃生歸楚

太守高齋客時名豈易同六朝相上下五馬共西東
非土悲王粲通家賴孔融登臨存勝蹟坐嘯挹清風
四塞黃河險三峰日觀雄楚才元自老郢曲本難工
裂素題班篋裁繡謁漢宮歸堪吞夢澤卧合起隆中
雨雪綈袍暗江湖劍氣空武昌魚正美彈鋏意何窮

送魏樸如孝廉省試時使君上計與偕

朝宗方岳入問寢孝廉行經術俱高第傳家接大名雲
霄雄北上事業壯南征奕世和戎策江湖戀闕情一毛
隨鳳集合浦讓珠明物色燕常滿人才楚至精千金圖
五馬片玉抵連城績奏龔繩直辭含樂鏡清賜車郎署
羨奪錦士林榮計吏分憂下文場得雋鳴召翁今乃父
丙相昔同聲會使臨軒日風流動漢京

再上少宰誦德述懷

弱冠登高第詞林擁重名兩朝廷侍從空冀走諸生身

自宮僚儔親看國史行稍遷猶八座加授即孤卿不盡
兼曹美長餘列署清文章關王氣儒術定家聲羽翼衝
天就波瀾赴海成見知同筆研記憶控銓衡雞肋才華
薄羊裘物色輕人應疑畫餅君但入調羹北斗如相照
南山亦至情少微雖冗宿同向掖垣明

天宮殷少宰翟淑人輓歌

弱歲徵箕帚童年託舅姑餘光東壁駐慈色北堂敷袞
褐雲霄度頻繁日月徂國香堪是夢閨秀豈為留零露

晞金掌清冰涸玉壺珠沈知旁斗絃斷憶將雛鳳逝泥
書暗鸞銷水鏡孤繪帷含藻落彤管帶花枯作楫君能
事藏舟妾敢誣網蟲遺挂在羅雀外家無雜佩傳淒響
殘機激壯圖乳糜疑自愛琴瑟訝相扶兩鵠云當復三
魚兆已符客悲來白鶴帝寵會青鳥河漢深難越天門
近可呼精靈成婺彩千古照皇都

重送張閫使

將才君自有儒術衆誰如廷對諸生策家傳孺子書百

蠻麾下出兩浙閩中居故事單醪在流言二卯虛名應
銅柱上身是玉關餘拊髀方今日君恩未可疏

夏日張茂才見枉林園

二首

殘書開積雨高枕對重林非爾秉幽興無人惠好音分
寧雞黍薄交自布衣深不改青松色堪知白雪心諸生
貧嗜酒多病老抽簪何必論邱壑金門總陸沈

其二

當時河朔飲未必勝陶家古井層陰合虛亭落景斜敲

暮來凍雨散帙映明霞樹嚙雙文鳥盤浮五色瓜清談
開暑氣白髮瑩冰華更有忘憂草能回隱士車

答潘仲子和贈張茂才見枉林園之作

似解滄洲趣因傳白雪聲時才方上下秋興獨縱橫車
馬分交態林園斷世情名寧花萼重句自薜蘿清弱冠
推高第雄飛失後生二毛如老筆三抱見連城業已深
移疾閒仍事耦耕有君堪倒屣一為款柴荆

夏日襲生過白泉精舍索贈

本自巖扉客承家事耦耕中年歸卒業壯歲託論兵身
覺儒流貴心疑俠氣輕垂成看一第良久遜諸生狗曲
群為詬毛詩獨著名貧終諳世味老益見交情伏臘書
相勞寒溫酒數行白泉鍾乳色黃鳥竊脂聲彩電投壺
出疎星對局明即知河朔會夙昔已縱橫

答報顧中翰

政本趨陪地身隨宰相行兩房深侍從三殿雅知名染
翰宮雲濕燕銜掌露清與聞鍾五字同病沈雙聲何意

乘槎客能憐伏枕生投詩迴俗態把酒說交情敢謂龍
門峻難霑鳳沼榮華陽今夜月醉眼為君明

初抵浙中感遇一首呈馬丈

冀北登車日淮陽卧閣年
檐帷非不撤舞袖竟難旋
一顧堪千里群疑託二天
門生高自出屬吏拙相憐
紫氣臨關動文星傍斗懸
樵漁歸計穩犬馬受知偏
物色中原起封章上國傳
江湖餘壯觀風俗美多賢
下榻時名盡分庭客禮全
隋珠如片月長在報恩前

贈陸膳部

清覽三臺上名家四姓前累朝霖雨望群從聚星賢北
斗尚書府南宮視草年秩宗周典禮膳部漢常員官屬
青雲氏才高白雪篇微言黃絹在美節素絲傳筆綵生
春署蘭薰握近天明光寧再入空此羨神仙

貞石篇為吳比部賦

砥柱高王室磐宗壯帝京支機河漢迴浮磬泗濱清孺
子兵書號郎官水鏡名一鞭皆至海三獻即連城絕學

驅羊起群疑伏虎生梧臺深自饗司寇雅稱平磊落披
雲氣馮陵轉壑聲雄藩隆岳佐華省映星精文陛含香
入巖廊草奏行綵毫常五色何限補天情

與子與遊靈隱寺吳馬諸公同賦

片雨挂龍湫清風嘯虎林海浮西域至江挿洞天深小
嶺將遙集名山豈陸沈地靈聞水樂岫隱見雲心金粟
寒應結香爐迴自陰藤蘿窈窕窈窕臺殿倚蕭森石笋高
遙筆蓮花淨盃簪何須懷謝客俱解越中吟

滄溟集卷十一